

משה משה

ישראל' ארבע

jav-jav

qonta' DeSDu'

DIS 2020 paqvam lIng lam 'aj Se'vIr malja'



2020 paqvam lIngmeH DIb © DoQ DeSDu' jen puqloD. Hoch lIngmeH DIb luQanlu'.

vemll' ...

vemll' ...

vemta'. per ml': wa'-pagh-jav-jav. DaHjaj: DIS 2851 jar 11 jaj 1. 12v02r.
muDechbogh Daq: pa' Hurgh. raS SumDaq De'wI'mey, baS SIrghmey je tu'lu'. jIH
tlhopDaq quSDaq ba'taH HumanHey. *chu'wI'HeywI': yIngu'*.

«HerIy jaStan jIH, wa'-pagh-jav-jav. qachenmoHta'.»

Daqmaj yIngu'.

«marIS mID. *Deb puHley'* 'oH vengHommaj pong.»

De'vam vIpol, chenmoHwI'wI'.

«chenmoHwI' HIpongQo'. *jaS* HIpong neH. jIHvaD *jaS* pong Hoch.»

lu', jaS. chay' chora'?

«Huuu jISovbe'. qachu'pa' Qu' le' vIqelbe' 'e' vIchID. nuq wIta' DaneH, wa'-pagh-
jav-jav?»

neH?

«neH! DubelmoH nuq?»

belmoH?

«Ha! qa'ang. bIHu' 'e' vIra'.»

lu' qaH. jIQamchoH. Qamll' ... Qamll' ... Qamta'.

«DaH HIItlha', jav-jav.»

pa' mejll' Human ...

...

...

pa' 'elqa' Human.

«chotlha'Qo'a'?»

chora'be'pu', jaS.

«qara'bejta! <DaH HIItlhej, jav-jav> jIjatlh.»

perwIj 'oH be' jav-jav'e'. wa'-pagh-jav-jav 'oH perwIj'e'.

«SoHvaD pongqoq vInob.»

qatlh pongqoq Dalo'? perwIj chu' 'oH'a'?

«qaparHa' 'e' 'oS pongqoq. perna'IIj qa'be'. latlh per 'oH neH.»

'ej potlh parHa'ghach qar'a'?

«qarbej.»

lu'. jIHvaD jav-jav DapongDI', jIlob, jaS.

«tlho'. DaH HIItlha'.»

tlha'II' ... tlha'II' ... ghur tamghay ... ghur tamghay ... qach wI'elHa'II' ... HurDaq
maHtaH. Deb. Do'ol Doq. chal Doq. Sum HuDmey.

«bIlugh. ghangwI' yIqel. 'IH qar'a'?»

'IH?

«'IH! Doq Debmaj. tera'Daq Doq 'op Deb 'e' vIjal. 'ach naDev Doq Hoch. vabDot
joqwI'maj yIqel. Doq je!»

joqwI'raj?

«joqwI'maj! yIqIm! qachvetlhDaq joq joqwI'maj! Daleghbe'a'?»

legh.

chovII' ... chovII'.

«Doq 'ej botlhDaq wovbogh Dotrar SuD tu'lu'. yuQmaj 'oS joqwI'vam.»

'ej Deghrajmo' SuHem qar'a'?

«qarbej!»

jaS?

«qa'Ij, wa'-pagh-jav-jav.»

qatlh chochenmoHta'? ngoQwIj nuq?

«toH! pIj jImob. meqvethmo', rut jI'ub. 'ach mutlhejchugh vay', jI'ubbe' 'e' vI'Ir.

chotlhejmeH qachenmoHta'. qoqmey vIchenmoH 'e' vItIv je.»

vaj qatlhejmeH 'ej chotIvmeH chochenmoHta' qar'a'?

«qar. qay"a'?»

jIHvaD qay' pagh.

«maj.»

chay' ngoQwIj vIchavlaH? nuqDaq qatlhej, jaS?

«Hu'ma ... nItebHa' HuDvetlhDaq mayIt vIneH.»

luq.

«maj! Ha'!»

yItII' ... yItII' ... yItII' ...

14v17r.

Deb ... HuD ... tawHom ... yItII' ... yItII' ... nagh toSII' ... nagh toSta' ... nagh toSII' ... nagh toSta' ... tawHom ... yItII' ... pawta'. HuD yorDaq SaH van Hew.

16v58r.

nuq quvmoH van Hewvam, jaS?

«yuQmaj mID cherwI' 'oS. chorghvatlh ben HuDvamDaq Saq 'ej tayqeq chu' taghta'. Saqta'DI', chImchu' yuQvam. rewve' lutlhuHlaHbe' Humanpu'. 'ach vumqu'ta'mo' chaH, marIS muD luchoHta'. yInSIp yap ngaS muDmaj 'ej QIt Satlhmaj wIturmeH HurDaq

tImaj wIpoch. Heghvo' chen yIn ... meqvethmo' le'chu' marIS. pawbe'chugh Humanpu',
chaq not yIn QutlhlaH yuQvam.»

tlhom chum buSchoH jaS ... tam ... tam ... tam ...

19v46r.

jaS, bIpIv'a'? qaStaHvIS repmey bIvIHbe'taH. SoHvaD Qel vIrl'beH.

«jIpIv, jav-jav.»

qaghelqa' 'e' Dachaw'a'?

«yIruCh, jav-javoy.»

jav- ... jav ... -oy?

«latlh pongqoq 'oH.»

De'vam vIpol, jaS.

«yIruCh. HIghel. nuq Daqel?»

qatlh perwIj chonob? vay' 'oS'a'?

«wa'-pagh-jav-jav?»

qar.

«Daj mI'vam 'e' vIHAr. qunQeD vIHAd 'e' vItIv 'ej muvuQ DIS wa'-pagh-jav-jav.»

qatlh? tera' DIS wa'-pagh-jav-jav qaSpu' nuq?

«chal yIqel.»

chalDaq SIqchoH jaS. chal qelli' ... chal chovII' ... Dotrar ngu'II' ...

«wovmoHwI'vetlh SuD Dalegh'a'?»

legH, jaS.

«tera' 'oH wovmoHwI'vetlh SuD'e'. 'ej DIS wa'-pagh-jav-jav tera'Daq 'ewropDaq
qaS wanI' potlhqu'. bIQ'a' lang chIqta' wIlyam charghwI'. noghmanDIyngan ghaH 'ach

'Inglan mIv'a' DoQ je. 'ach mIv'a'vetlh DoQ net bot net nID. vaj 'InglanDaq mangghomDaj Devta' 'ej 'Inglan ta' HoHta'. ghIq 'Inglan quS'a'Daq ba'choH. noghmanDIyDaq ghaHvaD charghwI' Damlu'. 'InglanDaq ghaHvaD Qovpatlh Damlu'. ghaH parHa' 'op. ghaH par 'op. mIgh ghaH 'e' Dam 'op 'ej quvchu' ghaH 'e' Dam latlh. 'ach Daj 'e' HarnIS Hoch 'e' vIHar. muvuQ yInDaj. wIlyam charghwI' bopbogh paq Dojmey'e' vIlaDta' 'ej jIHeghpa', ghaytan latlh vIlaD 'e' vIHar.»

Daj.

tam ... tam ... tam ...

jaS?

«qa'Ij, jav-jav.»

latlh pongqoq vIneH 'e' vIHar.

«teH'a'? nuq 'oH?»

wIlyam HIpong ... jIDaj je vIneH.

«lu'.»

21v30r.

Ha'. bIDoy'choH 'e' vInoH. bIQongnISchoH. wa'leS latlh HoqHom wItur.

pItlh